

巴

塘

詩

鈔

巴塘詩鈔

李華春實之評選

臨洮李苞元方稿

弟芎相徵校閱

閏六月六日

令節復天貺小年仍日長
恒情戀上國薄宦任
邊疆食愛青椒辣衣嫌
白衿涼數莖鬚又變六
月有清霜

清雅宜人

巴塘立秋前一日

洪爐鑄兩儀寒暑暗中移
火氣將銷日商飈又到時
感人蛭尚噪作客燕先知
邊塞寒來早裳衣授莫遲

虹

不必辨雌雄長橋架碧穹
斜拖殘雨白遙帶夕陽
紅龍吸西江盡鯢翻北海
空雲霓人共望何以贊元功

領聯工切

夢人

明月憐游子清光入竹扉亦知勞夢想特地現
容輝兩地精神合三更笑語稀簾鉤風忽動覺
後尙依依

一往情深溫李正派

槐花卽事

曾隨舉子昔年忙今日投閒入大荒衛藏安寧
星使少槐花時節醉壺觴

野塘遣興

龍藏早不乾風過縐羅紈更引流泉至頻添止
水寬雲涵千片淨山入數峯寒柳態仍張緒新
秋鏡裏看

蜻蜓偕蛺蝶側翅點池塘共助幽人興應耽野
趣長樹陰頻徙座水氣欲侵裳雲黑東南角催
詩雨不妨

靜者心多妙飄然思不羣

七月一日

商聲滿天地邊塞已驚秋閨月花仍放

前月閨
六戎星

詩云溪添
閏月花 高田麥未收
星飛驛使急
雨少野人
憂從事偕
子季徘徊
共倚樓

起佳

溪邊小園

蛺蝶點秋光
畦花一片黃
無人園僻靜
有石水
奔忙垣短桃
全露沙顏柳
半僵偷閒時
遣興行
坐午風涼

寫景而情在其中自然娟秀

雨

已卯言金 卷一 三
空中忽潑墨雲脚四山拖老畏雷聲大貧貧雨
澤多百家簷決溜兩岸水增波地瘠防秋旱山
田有晚禾

秋夜聽溪聲

時當羣動息祇有一溪流響異天人籟聲兼樹
木秋盪胸雲共爽入耳夜偏適恍宿咸陽驛秦
川古渡頭

一結情韻更佳

望二郎山

巍峩五千仞劃破天青蒼如望衡九面處處曾
二郎橫側形不一中窪類筐箱積留太始雪日
照色晶光上應產雪蓮花開十丈長世人採不
得帝座達清香去夏宿山麓灑灑雨送涼今秋
復經過八月飛嚴霜馬上頻瞻眺寒氣透衣裳
聰明未能爭面目慚相當

喇嘛垵道中

結屋兩三層平頂類廬麻瘠田家數畝青稞僅
輸租旄牛賃過客取貲爭鎗銖行未三十里路

長日已晡番兵十餘騎背槍氣豪麤昨來何處
盜禦人此萑苻追捕旣不得蠻荒網本疎予亦
有戒心促僕趁前途

瘦硬通神一洗纖靡

宿野屋

山昏何處宿曠野一間房囊橐堆如堵門扉卸
作床無雞更莫辨有犬夜能防尙恐馬牛逸羈
縻秋草塲

年侵覺夜長早發怯風霜展轉重衾裏咏吟孤

燭傍兒啼蠻婦乳客起主人忙銚小難炊飯晨
寒共飲湯

荒涼之景如在目前句句清真字字新穎覺
雞聲茅店之句未足稱奇

裏塘晤篠園兄卽事呈五律二首

塞外今相見霜髭各數莖年慚長一歲事欲話
三生頭戴晨星冷眼迷秋雪明艱辛君不憚喜
得弭戎兵

蜂蠆毒無幾熊羆威有餘終能停羽檄非是惜

軍儲諸部羈縻得片言讎怨除莫云蠻貊異信

可及豚魚

裡塘附近之毛了土司阿須丹津身故其子白甸崇慶例應承襲有阿須

丹津之弟羅朱雲甸勾引瞻對土司司工部三招率領番衆前來毛了幫同爭襲土司要取印信建昌道鄭靜山先生署打箭鑪同知李篠園兄在文都司圖蔭齋棠阿先後來裡塘會同查辦將白甸崇慶所屬帳房番民分給羅朱雲甸百餘頂瞻對土司出具永不滋事甘結完案

頭塘晨發

室暗無窗牖天明尙須燭點檢筆硯襍被同
一束登途不數里秋雪降滕六行行且復止抖
擻一身玉

兩山

兩山近相對上齊若平衡南山草木黃北山草木青
青女無厚薄霜降俱五更陰陽分向背彼悴此猶榮
浩浩乾坤內材貴擇地生春來必早逢秋至不先零

覽物有悟詞能達意

自喇嘛垭至三渠

行役太勞人不見風景好兩程併一程况是屈
曲道雨雪濕征衣浸潤將及襖板橋泥滑滑騎

過愁馬倒投宿時值西翻較昨日早爐火最親

人村酒喜已老

酒陳者謂老酒

蕭瑟八月天霜黃塞上

草刈來秣白駒務同侪儒飽戔戔三塏山一徑

入雲表明日勞登頓啟行趁天曉

難在真實樸老非大手筆不能

過三塏山至大朔塘宿

秋雪不盈尺漫漫已迷路得逢飯牛人導將山
嶺度中道苦飢渴無處可小住行行天色晚投
宿一荒戍是日中秋節雲開露蟾兔月光與雪

色清寒上下互竚望姮娥宮遺恨在平素衆仙
詠霓裳此會未能赴

景真情真寫來悽婉動人

八月十六日早發過大朔山行抵巴塘署

中

中秋一輪月已墮碧雲端馬趁晨星發人經積
雪寒古杉排峻坂巨石束奔湍貢使中途遇叮

嚀行路難

時巴塘宣撫司
遣頭人入貢

樹上冰如柱峯頭雪作冠下山愁徑窄過澗喜

橋寬郵宿煩軍吏郊迎勞土官家書來萬里珍
重喜頻看

副土司園中賞菊菊兩畦止紅色一種

小園亦有菊尋芳興轉賒均爲簪組客愛此隱
逸花八月傲嚴霜兩畦停斷霞文章少五色風
格自一家在昔陶靖節簪酒倩烏紗賓主何太
俗相對只煮茶

文章二句比意巧妙

秋郊寓目

古寺東門外一舒天涯目秋逼山林黃寒入溪水綠循行阡與陌家家正穫穀穡事蠻婦諳閒田番童牧今歲幸有秋民得果口腹鄰境不用兵更喜免迫逐

秋逼山林黃二句清微沒遠

裘慶堂太守赴昌都過巴塘詩以誌別

山路崎嶇甚難容五馬行一鞭才北上雙旂又西征禾黍秋風熟松杉曉雪晴天涯暫相會絮絮說平生

重話南江事勞心嘆六年紅杭輸鳥道白槎突
狼烟古縣無城郭荒村有陌阡繭絲兼保障黎
庶得生全

公前爲南江令時教匪滋
事轉運防堵甚有力焉

塞垣饒物產最著是昌都臍重香留麝裘輕腋
集狐清高君自慣節儉我何須他日整歸轡一
錢囊有無

三律精工具章法

出游

秋風招我出一整郊游屨水爭陂塘冷田閒路

徑捷逢人問菊花看客射楊葉從事不拈据經
年少邊牒

六朝人有此氣味

副土官別墅有牡丹一株移植家園中代

占一律

亦是吾家物移來用意深近供賓客眼遠慰子
孫心芍藥宜爲侍藤蘿莫漫侵知君性好酒澆
罷復長吟

和獻夫弟山頭秋雪詩

西風吹塞外積雪滿山頭壁立三千尺瓊雕十
二樓雲來迷玉葉月過冷銀鈎冠冕真司寇陶
鈎尙蓐收脊令棲野岸鴻雁落沙洲共訝邊寒
早蕭蕭又一秋

收處兩韻有神無跡

和獻夫弟九日詩

呈來新句墨初乾觸我情懷忽萬端滿院花隨
秋氣老高山雪逼日光寒授衣更較幽風早涉
世眞知蜀道難且喜埧笳相唱和天涯作客免

孤單

情景交融真得七律三昧

秋夜憶內寄子作新

月色冷窗櫺寒燈分外青
夜長怯孤枕天淨望
雙星井臼勞將代刀圭
術不靈塞垣千萬里猶
囑採參苓

悱惻篤婉深情若揭

巴塘九日登高同土司之子闕萬福及舍

弟二人

中原人在此九日必登高韻事添邊塞佳辰獻
濁醪山容成白首草色變青袍霜肅增鵬力風
道落雁毛客情殊曠遠秋思轉牢騷秦隴鄉山
遠徒然望眼勞

兩地插茱萸三人各不孤

余弟五人莊薦芍在家芹萱隨來巴塘署

中那知絕域况迴與故園殊鎖塞隴山古入河
洮水迂自從違鳥鼠遂爾落魚鳧邑劇撿刀割
崖懸叱馭趨短衣從事日令節感今吾
往復迴環游刃有餘章法本自少陵

署威遠明府蔡二兄書來詩以答之

籬下黃花老山頭白雪新
多君煩旅雁爲我致
文鱗絕域多堦堦吾鄉少縉紳
壯年須努力事
業宰官身

彈丸威遠縣疊石作城闌
一歲牽絲熟三秋鎖
印頻書生仍好學廉吏不嫌貧
治理應成譜何
妨寄遠人

清真老到不落套言

秋夜卽事

巴童催睡早燈暗月臨窻
芻少樵喧馬人稀村
吠尨鳴螺開晚梵吹笛起邊腔
旅客增愁思何當酒注甃

贈梨樹汎馬外委

梨樹稱名雅往來冠蓋疎
山高常積雪地冷不生蔬
對客作蠻語教兒鈔漢書
蠻人以四子書爲漢書
天涯征戍久應亦憶吾廬

憶陸兄秀三

天末思才子車應返舊邱
劉蕡竟下第宋玉易

悲秋書任三冬有文從萬里求君家傳奏議終
見達螭頭

友人問巴塘風土以詩答之

邊塞足風颭人稀村寂寥秋來少過雁夏盡尙

鳴蜩

岑嘉州輪臺詩云秋來惟有雁夏盡不聞蟬此地不然

玉箸蠻葱辣

金杯藏菊嬌沙田青稞外鄭重是甜蕎

巴塘蕎麥有甜

種苦二

嘆息

嘆息臨洮子今非年少時強弓空欲挽劣馬不

能騎累月閒游屐經秋覆飲卮加餐甘野飯倩
客射山麋

戛戛生新

追憶王芍坡夫子

夫子諱曾翼江南吳
江人曾任蘭州道

長鞭加駑駘日行不百里鸞鳩雖奮飛搶僅枋
榆止余昔秉鐸日從學王夫子阻我毋爲吏勸
我成進士學宦兩碌碌蹉跎已暮齒哲人不可
作前言猶在耳

海都闕招飲卽席奉贈

一飲輒千鍾前身是酒龍精神更覺旺言語不
嫌重兵且三年戍侯應萬里封何須嘆歲晚老
健大夫松

一氣渾成清空如話

贈巴塘汎把總何公

何陞松
潘人

松潘古要隘北去接洮陽生長俱西鄙同來又
大荒短衣披夜月古劍帶秋霜善病維摩詰何
時作道場

何善病
故云

夢

千林黃落日一枕黑甜時夢入天台路桃花露
竹籬

暝

夜氣方來寒氣增四山積雪水生冰蠻村早挂
黃昏月佛寺猶燃白晝燈擇樹羈棲惟野鳥閉
門入定有高僧癡雲不預人間事嶺上閒眠更
幾層

七律上乘如初寫蘭亭恰到好處

十月十四日聞副都統文公因事又赴西

藏

寒天天上去西域地形高風虐駁人面霜嚴脫
馬毛射麋饒野味泛蟻之醇醪春夏才旋返又
因主事勞

雪後

凍雲猶靉靄微雪不模糊風急宜扃戶人寒欲
擁爐縱橫飛野隼飢餓噪林鳥蕭蕭元冥節窮
通物態殊

巴塘冬日懷潘清溪孫慶庵陳大亨雲叔

毛冠英劉仲愷諸友

黃雲征士戍白板野人扉地勢卑如白山形曲
似幃三冬慳雪瑞五夜怯霜威寂寂年將暮良
朋悵久違

懷田夢九

不以儒爲戲踰閑能自防策懷方正士船覓孝
廉郎松桂寒仍秀芝蘭久更香何人復同志濁
酒話繩床

夢九嘉慶元年
舉孝廉方正

十月廿二日卽事

特特迎官長停驂澗水邊日斜山氣變屋破野
風穿有石人堪坐無爐火不燃寺中老都講來
此費周旋

巖下草

三冬岩下草青翠色仍深不使霜威到兼邀水
氣侵全生天地意扶弱聖賢心傲骨無依傍寒
松自古今

小中見大老杜徃徃着此議論

曉行

清曉見牛羊滿身渾是霜宿雲霾古戍斜月下
寒塘落後侍僮慢爭先過客忙沙塵容易起馬
上拂衣裳

宿雲一聯唐人佳句

送宋明府隨都統赴西藏

小寒大寒嚴冬節塞外千山萬山雪狐兔潛藏
飛鳥絕行人手皸面欲裂問君何事隨節鉞西
向衛藏勞馳跋君言此行充記室筆點硯池寒
氷結燈下頻呵氣不熱夜夜布衾冷於鐵到此

行未及一月半途已笑同跛鼃今日相見卽相
別匆匆近事不須說我臨岐路囑君切寒須酒
入觥心凸家家爐火燃楫柁莫嫌客館黔如笑
牛羊羶氣不可遏日久浸淫恐入骨此地有泉
溫且潔回時請君一澡裓

章法清楚筆力老健

雞鳴

雞鳴催我起雙扉且半闌燒燭三寸許東方猶
未白雲淡山隱隱風迴樹寂寂悠然清磬聲隣

僧頻憂擊

咏副土司宅中所養鸚鵡此鳥乃巴產也
爾非隴山鳥我是隴山人久與林泉隔宛如猿
鶴親絮飛千樹暗錦簇萬花春借酒談心事休
嫌來往頻

莫以羈棲故頽唐老此身羽毛宜整刷言語貴
清真會有開籠日終非失意人上皇問安否感
激意前因

饒有寄托

晨圍爐火

寒氣爐能禦袁安曉不眠撥殘灰未死吹久炭
方燃客擁鎚銖火隣分楫桡烟區區及有限無
褐更誰憐

冬日游北谷中

水落波瀾小山寒草木昏谷中平坦處岸上兩
三村拙鳥巢巖隙飢驢齧草根野爐無宿火煖
酒欸柴門

夢在家中與弟山薑觀行草諸筆跡

兄弟不善書雅好講翰墨聞人工行草有求無
不得屈垂儼金玉縱橫森劍戟蛟龍蟠勁姿蛇
蚓標新格勢或逕逕丈紙或長一尺雲烟襯畫
圖光怪動墻壁嗜好入夢寐相聚共賞識評書
猶餘事喜見弟顏色一樹紫荆花爛漫映第宅
過庭問詩禮情景宛如昔勝借邯鄲枕榮華俱
閱歷醒時覓筆硯作詩寄鄉國弟同此夢否爲
我通消息花枝當酒籌應憶梁州客

情真語摯筆有餘妍

巴塘種田歌

前山後山山雪白中間地窪水漸釋才屆四九
事播殖溪水灌田疏地胍土非駢剛雜沙礫百
畝先將馬糞積蠻家男婦齊盡力無牛賃牛敢
嫌瘠此地老鴉不種麥慣翻土中麥種喫人少
鴉多護不得惟望來春澤下尺豚蹄酒盂禱侯
伯禾苗先想餅餌食何異屠門大嚼客雖未得
肉意且適

古質

十二月盆中番菊

若遇陶公也愛憐數盆栽種自秋天嚴霜夜避
深庭內旭日晨暄古檻邊雖少晚香分老圃堪
留冷艷過新年勝他剪綵無生趣點綴徒矜藻
色鮮

十二月八日走馬過野屋題壁

人閒悶如醉馬閒驕且嘶前游澗水東今走澗
水西高坡橫枯荆碍冠頭屢低春近雲活潑山
晴雪離迷行過蠻人寨獨木豎危梯攀登第三

層身與樹木齊紅崖作屏風閒田繞廻谿客意
正流連催歸午時雞

試問風塵吏閒情有此無

鄭觀察靜山先生錄寄于役魚通詩併賜

別後奉懷之作卽事成七律一首

先生旌旆泣西戎毳幕氊墻問土風詩補大荒
經未備文煩重譯語能通此行暫作天涯客已
去猶憐塞上翁至味寄來雖浚泊細嘗元酒勝
鄆筒

囑人自成都寄來水仙花十餘本巴塘所未有也

現身偶爾到西天不是金仙是水仙從此夷人傳韻事此花留種自青蓮

自然入妙

乙丑生日巴塘作

陳家昆仲並馳名我字元方亦是兄再過四年

週甲子

余年五十六

尙餘九日屬嘉平

余生於乾隆庚午十二月

二十日今臘月小盡

佛龕燈燦分長照

官舍在寺中

鄰圃花繁

羨早榮不効老萊堂上舞壽星遙見老人明
冰雪淨聰明

感石梅溪觀察

夢裏如逢石曼卿自言去主芙蓉城豈知古事

成今事漫說無生勝有生觀察又臨川北境

公前

任保寧府於嘉慶十年六月補川北兵備道十一月二十九日去世度支尙感華

陽兵教匪滋擾以來軍須各項觀察總理其事男婚女嫁區區願不

得金甌覆姓名

慨當以慷應屬神來之作

瓶中早花

樹壯開花早，瓶長貯水多。
雙枝煩折贈，五字費吟哦。
窻紙胭脂畫，書帷錦繡窠。
阿誰憐蜀客，令我憶秦娥。
獨坐愁如許，相逢夢不訛。
日遲簾幙靜，酌酒醉顏酡。

情韻俱佳，可以奪溫李之席。

初春野望

北山春積雪，東嶺曉飛霞。
淺碧雙溪水，微紅一樹花。
苗疎不掩地，蜂少未成衙。
卽此是佳景，流

連西日斜

新移水仙開花

瓦盆瘠土又沙塵風韻依然故國春
莫悵芳根移塞外此間猶有賞花人

與堪布野坐

番寺掌教大喇嘛稱爲堪布

黑業除來白業進機心化盡道心存
偶然相對無言說反惱溪流觸石喧

阿耨多羅通梵語秀支僕谷解鈴音
何如盡在不言裏微笑拈花意更深

元宵有感

山隔家鄉幾百層
長空祇有一輪冰
遙知兒女游觀處
十字街頭萬點燈

看花

多情春日起春愁
又況天涯作遠游
慚愧不如閒樹木
年年自在趁風流

荊棘爲籬曲徑通
一園芳樹笑春風
惜無人面來相映
遂使桃花獨自紅

滂葩浩艷映高樓
萬縷千條拂陌頭
楊柳雖非

花樹比花嬌反遜柳風流

風流絕世不減張緒當年

北谷春游

東風來乍厲人仗樹身遮煮茗山泉近茹葷野
飯奢孤村空吠犬荒嶺亂鳴鴉何以消游興紅
桃正發花

古桃樹

兩人圍不了錯節又盤根老至顏如故秋來實
亦繁武陵千樹遠度朔一株尊堯率非仙境滄

桑誰與論

野園桃花

送酒紅衣人去後空傳歌曲想清才忽聞幾樹
垂垂發無那多情得得來塞外園林雖有主天
邊風月可爲媒春心未逐芳心盡日日勾留不
忍回

尋芳

另着尋芳屨單攜煮茗爐小橋臨碧澗一徑入
青蕪燕子江湖客桃花吳越姝相逢休悵晚春

色正華腴

浚而腴

殊方

求友不曾來好鳥訂盟無自覓閒鷗縱令蠻女

千回笑肯作殊方半日留

韓詩云越女一笑三年留山雪融

時空悵望村花多處且遨遊何當戍到瓜期代

銷却天涯一段愁

將擬尋花因大風不果遂赴香林

狂風如俗子亦能敗人意春游興不禁咫尺到

隣寺勁柏森成林蒼然含古翠天花嫌色相紛
紛任墮地香分物外僧蔭及天涯吏半日襲餘
清終身仰高致林杏與園桃不過工嫵媚何苦
日尋探流連花下醉

起筆超拔

漫興

行行三里外一片簇紅霞疑入天台路言尋仙
女家鴛鴦眠露冷鴛鴦桃花深蝴蝶舞風斜劉
阮塵凡輩歸來別恨賒

風人的派斷推此種大似吾鄉胡靜菴

三月三日游春至梨樹下尙未發花

折枝畫不羨邊鸞野外攜茶手自煎

放翁梨花詩云征西

幕府煎茶地一幅邊鸞畫折枝

處女無情箝笑口游人有意聳

詩肩春寒未落桃花雨風定初凝楊柳烟寄語

東君須勒住休教早放艷陽天

出門

出門今日合寅時喚起奚童莫要遲觸石馬蹄

敲碎火棲林鵲爪握高枝計程共有三塘路聽

訟應須半月期府牒不勞催促緊吾行及早整

鞭絲

巴塘土司與江卡營官有搆訟事件面奉駐藏大憲赴交界地方訊斷

聞巴塘地方惟空子頂有梅百餘株相距

一百六十里不獲特訪爲憾今二月九

日因公過此梅花正開雪亦霏霏何相

值之巧若此爰賦詩以誌之

人言此處有芳梅匹馬經過花正開半壑殘冰

堅氣骨一天春雪淨塵埃不逢高士空惆悵一

見伊人欲溯洄今夜寒山孤店裏夢中尙可策

驅來

氣韻高寒

爲梅花解嘲

梅花豈肯受人憐
入夢羅浮語妄傳
自是山精呈伎倆
迷魂化作一嬋娟

翻案意新詞亦清老

邦木寓舍

心寒塞上風
竟日卧帷中
筆札煩郵吏
時辰問侍童
招魂迷蛺蝶
祛病失芎藭
多謝南墩客
爐

添炭火紅邦木地方寒苦余丙寅仲春因公事寓蠻寨中區區一室非爐火不足禦寒爐中非煨牛糞卽燃楮柑
幸得南墩客民以木炭來遺

卽事

崇佛惟知拜寶幢蠻風今日失敦龐鄰封敢作
逋逃主頑戶輕違父母邦漸覺鳥言多可曉誰
言獠性不能降簿書期會無難事磨墨研朱夜
對釭巴塘土司稟控江卡營官收留巴塘逃民數十戶懇請查還

邦木塘晨眺

客衣狐貉厚寒氣尙侵肌已到春分日無殊冬

至時草荒青稞地雪綴白楊枝幾處人烟起熬
茶當早炊

空子頂聞鸚鵡

九坂雲開吳岳卑家山迢遞苦相思蠻中鸚鵡
天邊路恍似垂鞭度隴時

空子頂谷中漫興

芳樹聞啼鳥幽溪泛落花偶然逢好景忘却在
天涯

自然高渾

回巴塘過野園梨花尙開喜而賦詩

去時尙未飾花鈿直恐來時化作烟俗事將人

增懊惱辦理夷務江卡營官不遵傳訊而回花神與我有因緣誰

家玉琢千尋樹巴塘梨樹最高大似百餘年物花實俱繁中華未見此種幾

處雪翻三月天徑欲洗粧林下飲征塵尙復逐

絲鞭

野園遣興

細水作琴聲泠泠客思清菱花乾不落巴塘杏花俱

菱而嫩草踏還生新燕穿林過春鳩隔澗鳴呼

童採苜蓿歸去伴藜羹

五律多臻渾化得力於杜者居多

春游

宦游分外惜春華
來坐園林日又斜
暖起青烟籠柳葉
香霏白雪散梨花
渴憑茗清腸肺老
怯酸榴軟齒牙

時客饒去年石榴數枚

庭訟全無公事少

閒於樹下看蜂衙

仰面貪看鳥同此情趣通體雅鍊

樓上閒望

靄靄覆雲陰
隣園春色深
花從樓上看
鳥入葉間吟
清梵因風遠
遙山帶雨沉
薄寒人易中
今夜擁重衾

工鍊之極入于渾成

春晚

短榻坐長林
梨花落滿襟
感懷春事晚
回首夕陽沉
塞外勞人夢
隴頭流水吟
故園當此日
桃李亦成陰

沉鬱

三月五日客贈牡丹一枝

身滯殊方老心驚國色來怯風辭院落含露上
樓臺似有衷情訴頻將笑語陪清香留得住莫
遣戶常開

新詩如彈丸脫手

遣興

榴葉初生別樣紅晚春天氣正冲融山頭雖積
皚皚雪隴上還吹澹澹風步履獨尋芳草地攜
樽又訪牡丹叢莫言塞外荒蕪甚此地園林似

蜀中

食薺

野薺採來盈竹籠豈真種菜老英雄居夷久染
腥羶氣明志應存沒泊風滋味甘能和黍稷饗
殮美不讓葵菰鹽醯薑桂尋常物方法還宜學
放翁

鵲鳩

二三月內少幽禽此鳥時聞喚綠林度隴暗沾
朝雨濕隔溪遙送夕陽沉農夫感物興春事君

子留賓懷好音猶有不遑將父意翩翩翻動使
臣吟

不寐

有情學得似無情今夜愁從何處生却恨溪聲

來枕上攪人不寐到天明

丙寅三月十四日夜枕上口占此詩次日

接家信以妻亡聞

淒惋成詩妙

望對面高山

九曲屏風千尺強中間劃破透斜陽嬾雲不肯

爲霖雨高樹無緣作棟梁谷口丹梯險欲絕山
腰金刹爛生光幾時迴過鸚哥嘴背看峯巒向
帝鄉

鸚哥嘴在山脚
往來路必經此

第二聯用意深遠

游山寺

雪嶺入大荒梵刹閑絕巘來當誕佛日子季爲
同伴啟壽比丘齋誦經男子善隨喜聊爾耳溪
泉供清盥寺旁幾人家耕雪種禾晚井底笑蛙
黽雲中養雞犬客衣振高岡興與天路遠一株

松倚身萬疊山在眼東有黑雲起祝風莫輕卷
急須雨滂沱一救半月旱足下聞雷走山腰看
電轉今宵不須歸沉香添寶篆

卷舒自如詩中老境

夏四月中旬卽事

麥氣香如餅餌炊酒家預備煮新醅風和柳絮
從容舞日麗榴花爛漫開估客能醫採藥去戍
兵無事釣魚來已過浴佛龍花會寺外優婆繞
百廻

夷人男婦於浴佛節前後多日繞
寺歌頌謂之轉招招華言寺也

估客一聯事新而句亦佳

夢在家與文賢若游

洋州去後又衡山
瀟灑風流水石間
竹畫千竿君不慣
詩成百首我曾刪
蒼茫宦海愁中渡
迢遞家鄉夢裏還
攬勝探幽如昨日
超然臺上共追攀

清真工雅不落套言

蔬園遣懷

墻低畦小徑橫斜
學到樊遲興亦賒
抱甕身勞

當運幾種蔬眼悅抵栽花生兒萊菔參軍地供
客葫蘆丞相家祇有一端歉人意秋來不結邵
平瓜

雅人深致如在目前詩更精工入妙

三弟鸚一寄來哭幼女詩詞甚悽愴因以
詩遣之

造物善戲弄使爾生女好當其學言語便如綠
衣巧韶齡人家塾幼儀卽通曉孝經併小學大
義漸了了慣用兄筆硯楷書蠅頭小柳絮方縈

管荷英才發沼斗然被罌風吹入青雲表咄咄
造物意故使父母惱試爾忘情否聞道早不早
爾胡不自遣氣短英雄老反被揶揄輩從旁笑
絕倒問天亦多事爾詩勿存藁稿存一觸目愁
腸終縈繞我詩最有味可作忘憂草

蒙吏達觀香山妙境

靜山觀察寄蒙山茶

諫議新茶寄玉川開緘詩意更纏綿可憐精好
來蒙頂那有清冷比惠泉藏得雙瓶堪待客與

才六椀欲通仙臨風再誦東坡句骨鯁如君乃
謂賢

黨里寓舍

望中眼界斗然寬第四層房憩長官

夷人土屋層層相累

有多至四層者幾戶人居水畔兩山鳥道入雲端回
泉灌麥高坡綠積雪侵松半嶺寒更愛濃陰墻
角遍胡桃皮嫩綴瓊丸

寫景逼真

夢在家中前攝州刺史陳天石夫子賜鮮

荔支

不聽管絃三十春
分甘猶作夢中人
瓊丸別樹垂垂老
火寶堆盤顆顆勻
要比含桃先薦廟
還同懷橘欲貽親
隴西無此紅鮮果
初食應憐氣味新

五月十七日卽事

束縛乏閒情
將迎增俗事
權作半日游
馬回亦緩轡
午雨暗前山
夏木隱古寺
過客問余館
半畝偕金地

答陳立齋書

雅州連夜雨池水溢芙蕖

來書云雅州近日多雨

憶我一

年別多君千里書稽含狀草木郭璞注蠹魚小
物關風雅郵筒更啟余

俯拾卽是亦復精工

贈林明府蔭亭

君家林子羽名譽著詞壇入海琴聲古冲霄劍
氣寒先生善學杜後起直追韓三禮多疑義疏
通永不刊

君著三禮陳數
求義數十卷

巴塘詩鈔

卷六

重

江津水浩浩百里下渝州漁舍桃花晚鷗汀蘆
葉秋訟田原接壤濟險更同舟兩載巴山雨天

涯憶舊游

君宰江津余權巴縣篆通府連界

三年君報最西藏返轅時話別偕子季論文信

我師猶談秋柳句未讀雪蓮詩

君西藏詩草在行篋中未得捧

讀皇甫能爲序慚余非左思

鄰僧起屋

屋上重修屋菴僧弟子多不教容燕壘祇許作
蜂窠展席延開士分燈禮釋迦一方明月影鄰

舍亦相過

夢入棘闥

鎖院當年作草蟲吟聲未斷漏聲終而今筆硯

焚來久夢裏猶燃官燭紅

陝西貢院給舉
子大燭二枝

畚俗

垂纓類縵胡氊帶喜懸弧睽本權輕重寶原量
有無見官惟脫帽拜佛必燃酥青稞登場後荒
山好射狐

老潔

照鏡

貌逐風霜悴身隨天地遙何緣髭上雪微向鏡
中銷愁至常須遣魂歸不待招傾冠多忽畧取
鑒在朝朝

風味直追少陵

絕塞

澗溪衆水向東流直到金沙可放舟絕塞風雲
通上國遠山蒼翠入高樓墻隅樹老飢鷺坐圍
內花殘冷蝶偷身在異鄉時節改無人肯作致

書郵

高渾過李滄溟

初秋

衛藏迤西天盡頭塞垣時節異神州蕭疎舊雨
連新雨慘淡初秋似杪秋薄霧鎖空晨色暗涼
風入樹晚聲遒禦寒已作三冬計長物猶存季
子裘

有客自西藏來談其梗概

通道又西寧明駝發北庭唐碑零塞雨

前藏有唐顯宗

巴塘詩鈔

卷下

七

與吐蕃漢使應台星駐藏大臣二商販諸蠻貨
分界碑漢使應台星人總理藏事
西洋貨物由科爾喀轉販至前藏
僧藏千佛經柳傳公主植萬
樹不先青大招內有古柳一株相傳唐文成公
主手植至今猶茂此地多柳每歲入
春此柳萌葉獨早一
似衆柳不敢先者然

早秋漫興

高山草欲枯寒色滿烟蕪秋到西方早雲飛北
嶺孤梁空錢一塊園富菊千株酷愛長江集詩
如野鶴矚

工雅渾成真入化境

有客至自西藏

一路經過處應悲壯士懷荒村炊火斷峻坂卧
雲埋馬倩秋風送人憐曉月偕今宵留客宿可
使茶無鮓

塞外無秋蟲二首

塞外無秋蟲鳴秋卽是風寒聲滿大地勁氣懾
西戎

庭草尙萋萋不聞蜻蛚啼夜長秋寂寞轉使客
心悽

晚眺

讀多書引睡憑眺小樓東薄霧零殘雨斜陽映
晚虹風林森颯颯烟水遠濛濛凝倩龍眠手寫
歸圖畫中

中秋待月

羈旅遇佳節日匿待朗月塞山幾千丈光輝尙
隔絕隔絕不須與山高月更高數片白雲遠萬
里碧天寥欄杆鎖小樓徘徊獨自立襟袖忽生
涼颯颯晚風急

聞侄振新攝安定司訓寄示

明經豈在得高官且羨今朝苜蓿盤學政傳宣
新律令贊官拜跪古衣冠趨蹌大府無庸數音朔
來往諸生一任酸泮水不深亦不淺何曾風猛
有波瀾

偶然

風吹兩黃蝶時繞山樓飛吳天章句此景偶然遇閒

吟送夕暉

園中紅菊變爲黃色者數枝

佩蘭戶服艾臭味信差池荃蕙化爲茅美惡隨
轉移小園菊成叢昨秋紅離披今仍吐寒艷黃
華標數枝丹砂與黃金均屬大藥資煉深能變
化仙人不吾欺羅含昔致仕瑞菊生階墀余猶
戀微祿花前對沉思

會心不遠妙在大方

丙寅九日邀海

山程

二都閩王

大柴理

二把總小飲齋中

九日不登高恐觸望鄉愁邀來天涯客樽酒紛

勸酬飲酣忘其老偏裨想封侯一二年方壯心
輕萬里游紅葉未離樹點綴天地秋鬱鬱園中
桂晚花寒更幽感物增遐思銜盃銷旅憂明年
重九日後會如此不

中間着點景語得風人遺意

送程公褒自戍回蜀時程已除泉州洪瀨

鄉都司

前觀巴渝舞心想邯鄲步

公肥鄉人鄰邯鄲出
任川北左營守備

一聽蠻夷歌曲誤亦不顧秋雪漫層巒寒烟隱

孤戍防邊十三載歲向天涯度來如上鞦鷹去
如脫網兔中道暫流連懽然道其故貽我佛兩
尊供奉香一炷爲君禱平安萬里滄江路

讀罷

讀罷淵明詩乍如棄官歸看山山有情近樹樹
依依落葉隨風遠無數黃蝶飛彷彿洮水畔欲
覓舊釣磯

以疎浚勝亦頗似陶

贈江卡張守戎

洪成

聞君昔追賊所持惟長槍兩足疾於馬登山若
康莊紛紛散鳥獸奄奄斃豺狼以此異於衆立
功在戰場小醜旣殲滅從事又邊防萬里天涯
靜千山日月光祇可嫺射獵逐兎追黃麋有餘
波及我宜酬以桄榔食任厨人爲傳飪或餽餽
彼此不負腹彭亨嘲何妨

塞外地寒多不產小麥惟巴塘產而且好

送何把總回松潘

塞外從王事與君共二年虜酒不醉人藉此時
周旋遙遙戍相望夜夜火平安守邊學李牧乘

障笑狄山瓜期今已代七月理征鞍歸添行李
重氍毹兩三端直北是松州鴻飛路一千匹馬
向東去却嫌道路偏

與諸客談飲作

昔年從軍客今日列四座談到戰酣處精神不
少挫萬人肯用命那見弱一箇須與馘俘獻舞
蹈軍吏賀大帥登虎帳賞賜賤財貨剖符有尊
卑與宴無小大一路凱歌歸田父爲之和風抱
四方志姓名乃遠播嗟嗟此腐儒意氣日衰憊

舌空三寸在書未萬卷破祇效阮籍醉不受方
朔餓毫無分寸功何以副考課通衢任馳驟驚
駕嘆輶軻借觀天下事吾過真吾過

筆力蒼勁具體少陵

覓句

氣象何慘淡窮冬又邊徼卽景欲覓句腸枯無
詩料忽見霞五色東西紛炫耀異彩散遙天餘
輝連夕照絳雪嶺頭積綵雲山外遶遙遙隱赤
城點點明野燒向晚鷺不飛欲棲鵲爭噪呼童

燃殘燭紙上筆空到

目見耳聞無非詩料非雅人深致不能領會
其妙

奉寄秦曉峯同年時由給諫遷授湖北鹽
道

白蘭峙城南黃河流城北山水鍾靈秀篤生文
章伯早歲登木天烏臺又袞職近聞司鹺政鳴
騶入楚國磯上古黃鶴遙想振羽翼也隨簪纓
輩迎公江岸側蛇山吾舊游乘月看江色殘燈

沽酒市時聞吹短笛非宦亦非商旋卽整歸策
饑想武昌魚臨風憶疇昔公居監司位聲華已
赫奕喜極奉潘輿榮逾捧毛檄登樓望秦關鄉
愁亦可釋知遇

恩優渥報答自努力

格調高渾不落纖靡

懷清澗李學博坦庵

舉觴忽不樂思我同袍友西北各天涯何日共
杯酒憶宰渝州時遠辱贈新詩入懷明月朗清

風左右吹案牘勞晨暮文墨不遑務韻未和尖
又情空寄雲樹嗣來入邊荒兩載理糗糧坐聽
蠻語慣差免馬蹄忙行篋檢詩軸茫然失珠玉
白雪晚紛霏誰賡梅花曲乘障出狄山廣文縻
鄭虔燕山風雨夜曾記對床眠

步驟整齊起結更佳

寄吳洵可

水雖分清濁奔流無大小顧惟碧玉潭淵涵
幽抱鸚鵡不受羈終向隴山老漢禽入番地自

愧秦吉了

純用比體詩格甚高

懷于或菴時任閩縣主簿

一別音塵絕疑世無爾我閩海魚不飛塞雁路
相左廿年日月去萬里雲烟鎖曲成爲誰彈默
默橫琴坐

一起警絕餘亦簡老

曉聞磬聲

光淡牕有月氣肅爐無火隣僧冒寒起敲磬若

爲我斗然塵夢醒幾忘樊籠鎖心地一何清碧
池水淡沱閉關劉伶善晚起嵇康倚世務不來
迫披衣且靜坐

神來之作不可多得

友人貽燭

酒仙非吾友睡魔招不來苦此冬夜長羈思紛
難裁塞外有故人意氣無嫌猜助我以清輝舊
書讀百回始信陶淵明古今一大才東坡和不
得餘子安論哉燭盡對牕卧月光正徘徊數枝

影橫斜疑是梅花開

夜坐

老至將同退院僧
那堪空對寂寥燈
一爐火作寒宵伴
千卷書爲舊日朋
至味咀來濃似酒
殘灰撥後冷於冰
夜深不戀南柯夢
且看簷前挂玉繩

格調在許丁卯間

寄贈張忠州

屏風山繞玉溪迴
刺史登臨亦快哉
桂醕馨香

澆禹廟竹枝縹緲奏巴臺昔年小市常爭米今
日東坡合種梅一幅木蘭圖更好煩君遠寄塞
垣來

送人游峨眉山

山到峨眉峭且幽不知鬼斧幾雕鏤佛光時向
空中現客意將從物外游雷洞上升凌碧漢雲
濤東望沒烏尤盤旋仄迳臨危壁切莫輕身逐
獼猴

半輪山月似蛾眉恰有雙峯相對奇著屐勝登

孤嶼上聞鐘多在五更時遠邀羣岳朝天帝僻
爲諸蠻鎮地維騎馬青衣江畔路漁洋空咏望
峨詩

樸老高渾卓然大雅

移來水仙次年不花

一別水雲鄉含悽欲斷腸年華銷絕塞魂夢戀
清湘初帶煙霞氣終韜蘭蕙香惱人人亦惱何
若兩相忘

山谷咏水仙詩云
坐對真成被花惱

祭詩

七
祭詩當早起不待汝南雞色活花開樹光寒月
映溪導源千派遠登岳萬峯低此境終難到空
煩費品題

非於此道有心得者不能道

實之廣文假歸養親因寄贈

親在遠遊非多君早拂衣解鞍憐馬瘦入饌喜
魚肥園徑存松菊家山長蕨薇相逢林下日樽
酒伴斜暉

入寺

欲求安心法還須問禪祖
整履入空門辦香烟
如縷羅漢一十八緘口坐殿宇
時有天風來鈴鐸與客語

驚蟄

今日當驚蟄空將歲譜看
遐荒春未到天地氣
猶寒卉草埋根久萌芽透土難
穴蟲應怯冷僵卧似袁安

小園

昨日和風到塞外又兼微雨洗塵埃
小園一樹

杏花發便有游蜂無數來

妙有深意

寄贈南先生斗岳

爲政風流不可攀
况君宦迹近湘山
浮雲天上看蒼狗
秋月籠中放白鷗
民愛鄧侯空欲挽
賢如陶令早知還
門多桃樹園多梓
佇見陰連杖履間

聞于元圃兄授邵陽司訓戲贈

數行竹報附郵筒
得悉寒官獎鄭公
手筆輸君

今日大頭銜與我昔年同
賒來麴米爲春酒
讓出臺階種早菰
除却門人問字外
自家儘可課兒童

三月四日郊游

雙雙海燕與蠻鳩
故故飛鳴伴我游
萬點桃花紅雨落
幾行楊柳綠烟稠
草茵平坦容箕踞
紗帽傾欹任掉頭
忘却天涯尙從事
一時曠放似莊周

二三句寫景最佳

漫興

雨後牆陰一道苔梨花新傍晚桃開美人睡起
披衣坐玉鏡臺前繡被堆

妙有會心

林檎花

貧女寒廬甘守貧可憐今日也逢春薄粧却被
紅兒笑幾點胭脂染未勻

裡塘有鬪殺土司之事余呈情於鄭觀察
先生若用兵請從事觀察寄詩云撫邊

不用勞師旅端重深籌藉故人因以其
意奉和

籌邊樓曉角頻吹幾載西南控外夷

天子赫聲諸部懾使君德意遠人知偶然格鬪
同蠻觸何必張皇用虎貔殲厥渠魁餘不問佇
看處置合機宜

入山林見有木被火自焚者

生不在牛山得免斤斧危避人兼避地山木亦
若斯雨漬苔滿身將軍佩錦衣又如被髮客紛

已辨詩金 卷一 四
紛綴綠絲不審何道理陰火竟潛滋虎倒龍亦
顛縱橫在路岐我來阻其前下馬輒太息餘烟
尙騰騰撲滅已無及

山中有一木本花四月下旬正開高者丈
餘詢之士人曰野牡丹也大不類

窄徑盤旋陡又迂下山應仗小奚扶眼明忽見
花迎笑蠻女叢中有越姝

笑顏淡白又輕紅凝露含烟態更濃野牡丹花
殊不似依稀比作木芙蓉

在山在水在天涯萬紫千紅不一花造物何曾
立名字南強北勝任人誇

題妙詩更新奇

臨卡石

碧草如裙曳水湄黃花似靨點山陂此間婦女
無粧洗空使村邊叫畫眉

風韻絕佳

自臨卡石至章埧卽事

行帳門開向水濱數家毳幙暫爲隣夜來燃起

松明火惹得山龙錯吠人

地高環顧四山低山雪晶瑩眼易迷自是去天

才尺五雲中有犬却無雞

夷人游牧處畜犬不畜雞

戛戛生新饒有竹枝遺響

自章埧返咏所見

走馬平原入翠微野花香氣撲人衣臨溪忽見
鴛鴦起背着行人貼水飛

入章埧峽中

高山天設險夷界劃荒陬谷會三叉水碕存八

角樓湯泉燐鹿兔枯木卧龍虬匹馬蕭蕭雨寒
披季子裘

溪水

觸石雷霆怒不休一溪漲水解分流紛紛蛺蝶
過溪去祇爲花開滿小洲

贈張都閫

張公足跡遍天下西至衛藏東臺灣壯歲從軍
恥苟得垂老奏捷終南山惜哉未遂封侯志置
身尙在偏裨間且喜酬庸蒙異數頭上孔翠光

東坡詩集卷之八
上
爛爛我今瓜代將歸去君方出塞綏夷蠻握手
相見旋相別數日杯酒猶言歡當暑不效河朔
飲綈袍一雨生微寒梅子半黃杏子熟苜蓿花
紫榴花丹山地麥長掩烏鴉下溟牛伴黃雲眠
一年此日風景好多君初到開塵顏大朔山東
水草美可放賓馬任寬閒一俟秋風清塞外策
肥正好驅狐狙

贈陳四敬和

陳生來絕域年久二毛侵茶馬羌中市箏琶塞

上音蕃王頻把臂邊將亦傾心萍水相逢處占
爰利斷金

贈蔡二

忠信行蠻貊如君最可人藏香虔供佛邊酒喜
延賓夢逐潞村月魂銷蜀塞春還家非易事及
早覓麒麟

卸巴塘糧務篆

治重柔遠人羈縻遍海島矧此巴塘地久隸劍
南道分職理邊務宣猷在惠保俾各奠室家瓊

牆卽城堡承乏予三年瓜代歸去好無事庸庸
福自注下下考長官逢鄭莊推轂恐不早知遇
良可感仔肩何日了

別題副士官園林

五畝一林園閒來把綠樽禽猶與客語花似爲
余繁午雨常移榻秋風尙掃門別時情不盡匹
馬入荒原

卸巴塘篆務行抵爐城鄭靜山夫子卽賜
三年報最進關圖併長歌詩以誌謝

先生日日望我來陟岡我馬嘆虺隤急遣肩輿
催行走一見先生開笑口贈我報最進關圖紅
樹山山風景殊長歌珠聯二百字片紙縷述七
年事浮雲無定忽西東總在青天留蓋中先生
愛我忘其醜下交真視如舊友我今樹立梁公
門逢春難忘雨露恩新詩音節同韶護何以報
之無佳句檐帷駐處凝秋烟明朝拜別又東去
浮雲二句入此興妙

入榮經縣界

一入榮經界行人意暢然風光翻草木和氣藹
山川下溟偏多水中華別有天回思居塞外愁
悶過三年

喜溢眉宇

過榮經縣城謁朱明府不遇

昔日題詩處重來過古原四圍山逼縣一帶水
環村鳥悵青雲遠蟲愁白露繁主人不在署客
況與誰言

遇朱明府却寄

不料神明宰相逢道路間船停秋水渡馬立夕
陽山話舊無多語傷離有慘顏塵勞計將息此
去唱刀環

巴塘詩鈔卷下